

COMUNICATO n. 689 del 02/04/2024

Traduzione in mòcheno

Der asesor Marchiori trèfft se pet de Tolgamoaschòft Hoa Valzegu' ont Bersntol ver za klòffen van haus

[Mòcheno] “Hait sai ber ka Persn bou as ber hom klòfft van tema van haus zòmm pet de Tolgamoaschòft Hoa Valzegu' ont Bersntol; ober sai' as n lòn ist a sòch as ber belln tea' zòmm pet òlla de Tolgamoaschòftn, ver za kennen de problem ont asou vinnen zòmpintn. Zbischn de temen mear bichte, a toal ausònder ont glaich ver vil, sai' de sèlln van miasn de haiser lòn, de moglechkait za vernaiern de òllgamoas'haiser as lar sai', ont envire trong de politik ver de za gem ompòrt en de jungen ont en a gamoa'schòft as bècksit ont as elter kimmpt ont enkeing gea' en de familie asou as de meing kinder hom. Bail de doi legislatur men bill trèffen de Tolgamoaschòftn ont de Gamoa'n bavai de Provinz bill glaim sai' aupau n hilf”: der provinzalasesor en de politik van haus, en pahalter, ont en de òllgamoas'pahalter ont mòchen kennen de autonomi, der Simone Marchiori tuat asou zòmmsetzn der trèff as hòt se gahòlt en eirta as de 26 van merz en sitz va de Tolgamoaschòft Hoa Valzegu' ont Bersntol bou as s ist gaben der president Andrea Fontanari ont der Gabriele Dallapiccola der toalmemmer va de Junta va de Tolgamoaschòft as kennt se aus va òllgamoas'haiser, zòmm van viarer van dinst as no stea' en doi sòch.

Der president Fontanari sok as der doi ist an bichtegen trèff ver za klòffen van tema van vonen, as toalmòcht van hilfplan as s ist kemmen u'ganommen van a kurza zait va de Tolgamoaschòft, ont en de problem as kearn en de stòtt ont en de telder aa, bavai s ist bichte vinnen haiser za gem en de lait as noat hom ont tschbinnen en de verkearmittln ont zòmpintn vinnen zbischn de struktur. De gamoa'schòft, hòt derklort der Fontanari, ist noch za bòcksn ont s haus ist an tema as zuakeart en vil lait, junga ont eltern aa. Der Gabriele Dallapiccola hòt unterstraicht der problem van hoachen kòstn van elektresch as hòt gahòt en de doin leistn jarder. Bail der trèff hòt men klòfft van vonungpahalter as as n lòn sai' ont en de naiekaitn as de Tolgamoaschòft hòt gatu' ver za gem ompòrt en de lait.

Ver sèll as hòt za tea' pet de òllgamoas'paupahalter ont s problem va ber as nèt zolt der zins finz za kemmen vorttschickt va haus, der asesor Marchiori hòt unterstrichen as men hòt u'ganommen za prauchen an vurm avn gònze provinzallònt pet en beil as men geat za schatzn de dinger za tea' as mear rèchet sai' ver de lait as birkle en a groasa noat stea'.

Der asesor hòt gadenk abia as bichte ist ver za gem ompòrt en de neat van a haus, biderbèrtgem en de haiser va de òllgamoas'pahalter as nèt pasitzt sai' asou za meing sa bider gem en de lait as s rècht hom za krieg sa. Ver dòs de Provinz bart envirtrong zboa aosschraubungen as “booster” gahoasn kemmen, ver za unterstitzn s biderbèrtgem.

“Men schatzt - hòt tsòk derzua Marchiori - za gem òndra paitroger ver za biderpaun sèll as ist ont ver za kaven nais”.

Pet Itèa, hòt derklort der asesor, men ist no za schatzn de haiser as, ver bou as de galeik sai', meichetn praucht kemmen en òndra ont naia vorm. Zbischn de plinder as men no ist za schatzn, hòt derzua tsòk Marchiori, ist der zòmmlen housing, der sèlberbiderpau van haiser, vorm za unterstizn de lait za verzinsn de haiser, verlaichtern der lauf ver za gem aus de òllgamo' haiser, paitroger ver za kaven ont ausrichtn s haus ver de jungen. "Pet de kollegen va de Junta Gottardi ont Tonina - hòt derzua tsòk der asesor Marchiori - ber barn drautschbinnen za òrbetn en de òltstòtt ont abia za gem aus de strukturn en de lait as mear noat hom".

Vourtrog en asesor Marchiori

<https://www.youtube.com/watch?v=kryGVaakkhs&t=1s>

Vourtrog en Andrea Fontanari

<https://www.youtube.com/watch?v=ZT0xAxzSNCU&t=2s>

Oorganommen

<https://www.youtube.com/watch?v=URFlTHk-IPE&t=12s>

Link ver za nemmen aro ont vourtrogn

<https://drive.google.com/drive/folders/11t0mq7tQTEgSO6SprD561P7wlHmuAATC?usp=sharing>

Ibersetz gamòcht van Sprochtirl va de Tolgamo' schòft Hoa Valzegu' ont Bersntol

(cdt)